

知止齋詩集



知止齋詩集卷第五

常熟 翁心存

古今體詩九十六首

起戊寅六月由汴梁送史氏諸生入都九月還汴梁己卯會試

不第客南目戴相國家

庚辰會試仍落第作

渡河

步出北郭門河聲在天上排空殷怒雷倒立蹙駭浪驅  
車上危隄平挹礮山漲下視邨墟煙窅窅出深壑黃流  
西北來岐華扼其吭自從下底柱千里始奔放豫州土  
墳墟地勢更夷曠日夜東南趨一綫賴隄防戢戢黑岡  
口衆力資捍障全城萬戶命呼吸關得喪我乘扁舟度



雒誦小海唱亂流狎風濤布帆告無恙回視鐵塔尖突兀正相向憂懷夫如何下策思賈讓

延津道中

紆回沮洳盡對面沙嶺巢長風吹不動積此太始雪得毋媧皇世鍊石遺玉屑或恐羽淵神息壤漢濱竊連天無草木厚地豁崖穴想見古黃河蕩涵此融結我行當季夏亭午觸炎熱仰瞻淨纖雲俛視亂深轍呀呿類渴鯨嬖屑笑跛鼈登陀四牡煩下坂兩靽絕遙指延津城百雉影明滅安得振羽翰幽燕夕弭節

彰德道中大雨



驅車鄴城闔赤日正亭午解轡憩荒坰削瓜祛溽暑羊  
角驚回風龍公忽行雨萬雹吐蛇盤千霆殷鼉鼓黑雲  
隕壞牆白點射飛弩驟馬銜難收揮鞭闔遑數寒生身  
上葛溼盡橐中褚遑迤越陌阡延伫失徒侶迷途陷左  
左問津孰語語平原莽無際村店在何許曛黑投衡茅  
明滅見秉炬對竈且燎衣踞觚聊酌醕我生雖長貧伏  
臘足安處胡爲牽率行甘受跋涉苦季布輕然諾吳札  
重縞紵誓將披膽肝甘復惜腰膂翦紙招驚魂斷帶續  
餘炷宵分再三喟感我長羈旅

折脅



我行渡滹沱河湑阻深淖驪駒雖已駕咫尺安可到村  
農負我趨力似足排莽初如升枝猱趨捷善騰越俄焉  
曳泥龜蹒蹒漸跣跣跣跣水上鳶獵獵風中燾祇虞鴻  
翅垂忽作蛟尾掉淒然左脅折痛甚鵝項拗范睢已瀕  
危斛律竟遭暴口噤但捫膺魂蘇迺絕叫晚來駐荒郊  
疇侶相慰勞是日野宿  
正定城外束帛且裹創行藥那能療人疑  
魏犇傷我媿子春孝默坐蕪蕪亭懷哉心自悼

邯鄲懷古

公子翩翩誇雅度諸君碌碌盡庸才不如梁客辛垣衍  
猶識先生玉貌來



定州

中山釀可沽投店且提壺爲問今宵醉能支千日無聊  
當河朔飲難覓酒家胡夜半婆娑舞聞雞又戒途

出都

薊北風高葉乍稀江南稻熟蟹初肥如何去住都成左  
其奈飄零與願違家計愁無新置橘行囊賸有舊縫衣  
閒雲未準歸山約羞與賓鴻一擡飛

西直門遇雷雨

照眼金蛇動地雷蕭然襖被出城隈乍驚白點從頭撒



旋見濃陰撲面來農事已憂秋李輓

吳諺也見范石湖詩注

我行

況值馬虺隤挑鐙話雨前宵事憶著停雲首重回

暑雨來時已慣經茲行秋雨復冥冥果然身世同桃梗  
合是生年直水星深淺潢汙停軌轍迷離煙樹鎖郊坰  
卻看人海知何處惟見西山一髮青

定興道中

深林蕭槭咽哀蟬山色雲光作態妍幾點寒蘆明夕浦  
兩行衰柳破秋煙晚禾欲割猶垂穗積潦初收漸露田  
回憶來時觸炎熱風塵褴褛倍堪憐

楊忠愍公祠



萬古流不息蕭蕭風色悲驅車渡易水敬謁先生祠有  
明當中葉王道方淩遲將相互鉤結中外皆恬嬉維公  
奮忠義拜疏兩擊之一擊投遐荒再擊身遂危椒山自  
有膽安用蜥蛇爲嚙齒剋杖痕血肉何淋漓堂堂員外  
郎名高官不卑遺蛻葬引村精靈儻在茲上堂拜遺像  
下階讀穹碑碑文典以則正論兼微詞以公比鄂王忠  
義同所歸顧其所遇主優劣微有差高宗太孱懦疑獄  
惜莫知世宗頗英斷兩奸卒誅夷雖則旣誅夷明室遂  
以微柄臣相繼用馴至不可治正如受病者諱疾忌良  
醫二豎雖幸去元氣終不支我來瞻廟貌俯仰有餘思



烈烈張夫人百世列女儀流芳照白水配食禮亦宜題  
詩弔忠魄載告良有司

安肅大風

涼氣極蕭騷秋聲入聽遙無心雲影亂得意馬蹏驕  
起波千縷吹乾路一條黃花須護惜莫使落英飄

客夢

西風吹夢去一晌已還家穉子情親洽高堂笑語譁  
覺來剛夜半依舊在天涯更欲尋殘夢迷離路又差

過臨洛關

莽莽拱千山孤城燕趙間秋風度洛水晴日壓雄關地



險三河接峰高四面環畿南嚴鎖鑰莫恃戍樓閒

九日過盧生祠

斜日叢臺冷西風落帽寒津梁疲此子屈曲拜仙官我  
亦悲秋者深知行路難睡鄉雖有味未敵醉鄉寬  
呂翁傳妙術何似費長房枕上功名幻壺中日月忙神  
仙終有劫將相更何常願借茱萸酒臨風酌一觴

邯鄲道中

登高無計兀征鞍秋不勝悲強自寬黃鞠花隨人意澹  
白楊風戰雨聲乾莫辭囊底三年處便博樓頭一笑難  
我已塵勞深閱歷一雙醒眼過邯鄲



宿宜溝驛聞風雨聲和謝生承莖韻

暮雨蕭蕭木杪風淒涼孤館九秋中  
澆愁濁酒醜難白倚壁寒釭慘不紅  
欲注南華慚郭象擬游東國學梁鴻  
何時乞得監河粟便遣奴星送五窮

陳潤堂訪秋圖

莽莽夷門道相逢一笑難菊花愁黯澹  
蟹譜話尖團風味江鄉好生涯酒國寬  
家山秋色老行矣莫盤桓我亦悲歌客  
依人作計迂浮生同落拓鄉夢易饑餬  
何日乘扁舸相從泛尚湖攜尊尋釣叟  
重繪問秋圖童二泉山人泰階畫杞菊圖見贈走筆奉訓



苦乏仙家大藥資  
蓬壺方丈繫人思  
憑君畫取靈苗樣  
便去嵩陽尋本師

霜林一色鑄秋煙  
自注金鉞釀菊泉  
何必更求青石髓  
團蒲穩坐近千年

丹鑪小甌發幽馨  
夜半焚香讀道經  
忽聽雲間獅子吠  
仙山靈藥已成形

繞籬杞菊長芳叢  
甫里當年隱此中  
何日與君乘舸去  
吳江秋雨綠濛濛

得梅江書卻寄

鯉魚風信上繁臺  
帶得陳遵尺牘回  
連夜月明吹夢去



昨宵燈語報書來交從真極方能澹氣到平時不露才  
我是天邊倦飛鳥寄聲鷗鷺莫相猜

蕭疏老屋對蓬廬聞道君來此卜居闢地好延三徑月  
當窗先妥一牀書家臨讓水廉泉際人在羲皇太古初  
尤喜比隣多儉樸未妨蹤跡溷樵漁

多君能慰倚閭情明歲公車絕意行入世斷難容嘯傲  
榮親原不在科名由來人事無憑準試較天倫孰重輕  
媿我未除營欲念三年留滯大梁城

饑驅那得賣文錢舌在囊空祇自憐永夜河聲長伏枕  
夷門山色總如煙迢迢鄉國遠千里寂寂羈栖又一年



縱使鷄鵒戀鐘鼓隆冬風暖也淒然

空齋短晷感離羣彈鋏高歌每憶君四面煙霞分宅占  
兩家子弟讀書聞深宵門外三更雨小飲牀頭一甕雲  
何日歸來尋此約過從朝暮細論文

登高懷古

夷門高影鬱崔嵬曾見千秋戰伐來大地波瀾沈艮嶽  
列仙歌管歇繁臺悠悠兒女矜庸福莽莽河山感霸才  
欲弔信陵迷處所斜陽蔓草使人哀

詠雪

天風橫絕大河濱一片飛霰散玉塵竈底有煙休附熱



門前無路敢干人  
瑤池飲罷將迴軫  
瓊樹花開詎算春  
底事天公工戲劇  
任他落溷與飄茵

風團霧壓影重重  
冷徹陰厓禁蟄龍  
大地儘將銀窟鑄  
羣仙都受玉樓封  
松雖強項僵難起  
竹解虛心拜亦慵  
獨有梅花逋峭甚  
忍寒猶在最高峰

昏鴉瑟縮誤投林  
空谷知難問足音  
人隔重簾雲悄悄  
天垂四面夢沈沈  
彈成琴操寒凝指  
嚼徧梅花冷到心  
差喜舊時同調在  
祇應乘興訪山陰

藐姑仙子玉爲膚  
稱到仙衣重六銖  
撒手珠光原狡獪  
彌天銀氣易饒量  
來縞帶三分窄  
融入紅鑪一點無



取次花叢好細探待得春風迴薊北定知花信徧江南  
江南春好柔風颺春雲翦出春花樣何日歸來進一卮  
人與花俱壽無量離家留留已三年每到花朝一惘然  
幾度仙山風引卻今番香國夢應圓上苑看花須及早  
何堪屢走長安道折取瑤華春作棖駐顏莫使韶光老  
尋花不見替花愁願與花王共唱訓解鞍且買中山酒  
閒立空庭祝石尤

郭隗故里

馬死留其骨豹死留其皮皮骨且不朽矧迺抱令儀令  
儀人自具所難在逢時偉哉郭先生故里傳在茲韜精



守其璞白首不見知一言感燕昭擁篲奉爲師名賢聞  
風來冠蓋紛交馳報讎雪大恥霸業從此基渭濱釣璜  
叟夙具鷹揚姿四皓未安漢自采商山芝先生才與德  
詎足彷彿之良由時變值遂彰遇合奇坐令身後名赫  
赫百代垂人生有顯晦豈與夙志期寂寂蘭陵令千載  
使人悲

劉伶故里

三馬同槽兆噩夢太平引絕作三弄嵇康死後更無人  
先生迺著酒德頌典午大事勢已成逆之則死從則生  
死誠無益生失節爰隱於酒全其名禪臺故事當如此



司馬家兒作天子置君紛紛似弈棋山濤王祥婦人耳  
婦人之言那可聽一國皆醉先生醒諸公袞袞禪中蝨  
奚翅果羸與螟蛉君不見靈均哀憤先生笑一醒一醉  
真同調酒酣脫帽讀離騷湘水茫茫自憑弔又不見步  
兵慟哭悲風塵屈節曾爲九錫文途窮祇覓三升醞合  
讓先生作大人

邵鞠泉上舍曰誠許以羊腔相餉戲作長歌促之  
長安索米不易居日日塵堞衝天衢殘盃冷炙到處饜  
面目黧黑饑腸枯夜眠捫腹出芒角幽夢一片飛江湖  
長腰米催竈婢煮缸面酒促奚奴酤蠶豆莢肥婦子摘



貓頭筍嫩畦丁鉏金丸釘盤熟盧橘玉鱸入饌新鱗魚  
覺來采頤空歎吁鬱鬱居此胡爲乎故人數日不相見  
憐我刺促色不腴傳語許餉熟羊胛起舞徑欲歌烏烏  
奈何看囊一錢無換羊帖好孰肯沽有石難叱鬼難唾  
楚騷賦罷空煩紆勸君火速開行廚洗鶩爛煮調香酥  
平頭奴子擔盆送老饕正好供朝餽爲君開口恣大嚼  
金澗之酒騰百觚醉言豈辭山童殺原兆定卜壤公塋  
饒奴一了腸胃潤飽睡不嫌羊蹴蔬

鞠泉得詩以肥羊見餽走筆謝之

陶盤相餉賜緋羊發器驚看五色光怪底伏龍鞭不起



此中恐有雨工藏

時有小旱

坡老文章供折菜右軍書帖換籠鵝惡詩博得羊淹喫  
較似前賢福已多

紅豆山莊玉盃歌爲江靜蘿丈曾祁作

丈之高祖湛源先生精鑒術曾療河東君疾宗伯以  
玉盃一爲先生壽子孫世守之有年矣緘鐫不謹失  
去者垂三十載丈復得之徵詩紀事噫趙文毅之兕  
觥至今猶凜凜有生氣而此盃之去留不過用資譚  
助而已然則君子其亦慎所守哉

鯉魚風起夫容裏欲落不落相思子碧玉盃調九轉丹



返魂香暈霞文紫山莊紅豆花開香尚書風流壽正長  
鵲鵲夜踞瑤姬病骨出飛龍臥象牀此時儻絕尚書膝  
異日存孤仗誰力判將三寶謝神盤祇爲佳人難再得  
仙人鴻衛生春風骨青髓綠顏桃紅一服刀圭能駐景  
祕方鈔得自龍宮尚書捧盃听然笑當筵願比瓊瑤報  
洞見胸中癥瘕來盃脣湛湛蘭英照絳雲轉瞬劫飛灰  
不及玲瓏玉一盃二百餘年明月影曾經羽化卻歸來  
盃中春色長不老紅豆山莊滿秋草

送鄧翊庭孝廉復讚南歸

暑雨三千里憐君匹馬歸  
難難通耗問老病念庭闈積



潦鳬應沒連山鳥不飛長途須自慰莫使淚霑衣

簡心字

荒荒人海裏著我兩閒人聚散忽無定迢遙不可親已  
愁成契闊猶喜似比隣復恐秋風起相思感白蘋

深譚恆半夜案戶見明河隔絕今如此幽懷可奈何始  
知身是客漸覺語無多鐘鼓未云樂矧爲勞者歌

樹老陰多合雲輕閣不流空齋風作雨孤簾夏生秋長  
日那消此故人能過不慊慊春石上一飽且休休

露氣空濛白燈花慘澹青有懷誰共訴無夢不妨醒鍛  
翮憐籠鶴垂芒看客星因君發狂語騷屑那堪聽



鶴影圖 并敘

中州學使院西偏老屋三楹余曩時游息所也庭有  
枯樹一株虬枝鐵榦夭矯軒翥月來窗北輒寫其影  
僵痿獨立宛似老鶴童二泉山人就窗紙摹拓目爲  
鶴影圖屬余作歌人事匆促未暇也今年夏史生兄  
弟入都復出斯圖見眊意有所觸慨乎言之

蒼梧雲飛入大梁化爲野鶴淩風翔裊裊月下弄清影  
失勢一墜形枯僵銅柯鐵骨不可控顧影猶疑作晴哢  
乘時或恐變蛟龍得地曾經宿鸞鳳高齋永夜涼月陰  
博山香燼停瑤琴三更孤影向何處太華西側黃河深



次韻答鹿樵閣讀

1. *Phragmites australis* (Cav.) Trin. ex Steud.



鹿樵以新詩見示依韻奉和

玉漏遙傳乙夜庚  
蓬萊頂上綺霞生  
鳳池清切三霄近  
鴻筆紛綸七步成  
領袖久爲黃閣長  
歸心只戀白雲程  
故山梅信應相待  
遮莫多情動廣平

牆角垂垂挂盜庚  
高齋野趣自然生  
編籬樣比前年好  
栽竹陰看上番成  
退直狹香時靜坐  
課兒學字日分程  
從來大隱如君少  
休更歸山羨子平

積雨疊前韻簡心宇

排日祈晴只望庚

四時農占久雨望庚晴

蝸涎篆壁水衣生  
客愁

攬雨飄難定  
秋夢和雲晝不成  
念我勞勞盟息壤  
替君



緩緩計歸程階前一碧清如許鑒取澄懷水掾平

秋雨浹旬獨酌排悶

無數癡雲屋角隕倚天長劒撥難開一生定著幾雨屐  
排日須傾三百盃秋井塌時驚白骨空階平處長青苔  
長安冠蓋交游盛今雨不來舊雨來

秋雨述懷

四面雲頭閣不流闌風伏雨幾時休直傾萬斛天瓢水  
併作連宵薊樹秋侵曉鐘聲仍帶溼滿城煙色迴含愁  
人間咫尺應難辨擬泛靈查問女牛

撥盡銅鑪一炷煙力微敢擬補天穿漾開簾額波難定



滴碎蕉心夢不圓自古悲秋惟我輩而今聽雨況中年  
破書敝篋牀牀溼獨客情懷倍可憐

潑潑平階水一窪飛鳬拍拍以爲家浹旬只恐生禾耳  
三尺多應沒稻花永夜空堂盤蝙蝠衝寒殘櫟學鰕蟻  
明朝斗米還增值歎息吾生未有涯

冷氣陰森徹骨寒秋初已覺客衣單被池綿薄裘仍綻  
簞角微生熨不乾乳燕巢空求食急饑鷹翅重欲飛難  
庭前鞠藥伶俜甚雨打風吹不汝寬

從來塗淖說江鄉如此愁霖未慣嘗無數水衣多繞榻  
有時蝸篆亦緣牆若爲桃梗嗟微命欲療河魚少禁方



自信泥中吾有分故園秋色莫荒涼

年時綺席倒金尊秋雨秋風憶白門連日心情如中酒  
懷人况味最銷魂附書南國憑潮信翦燭西窗認夢痕  
北巷東隣車轍斷寸衷脈脈與誰論

送心宇歸里時心宇偕屈偁甫明經軼自潞河同  
舟南下

白雲辭故山朝夕尚相聚秋風忽吹散上下影同互朝  
來君過我別我江南去謂當少從容驪駒已戒路君歸  
非得已何迺太恩遽豈不欲留君知君不可住功名水  
上漚富貴草頭露饑寒亦有分妻子那不顧我今自誤



矣安忍復相誤灑淚從此辭詎免別離苦去留兩非計  
同向秋穹訴攜手上雙橋夕陽滿雲樹目斷望丁沽煙  
波渺何處

兩度君送我送我游大梁新詞屢移贈字字含清商置  
之懷袖間行藁生輝光今茲我送君何用壓君裘贈君  
雙明珠羞澀愁空囊贈君七寶劍剗頓無鋒鏑不如贈  
君言久要定不忘久要夙所願矧可得報章立身互砥  
礪舊學加商量人生志氣合豈隔天一方後會雖難定  
進德期無疆勛君兼自助好修以爲常

與君忝葭莩汎汎僅相識自從走京華論交始莫逆前



年城東偏小聚待射策

丁丑春同寓鍾  
仰山學士宅

連牀聽荒雞披

露見肝膈一朝別君去去作梁園客契闊隨陽鴻進退

遇風鷁去秋宣南坊話兩數晨夕

余送生徒入都應試  
君亦復來京師相遇

鹿樵郎舍  
留連旬日

涼陰潤衣裾冷氣逼几席恩恩難具陳鬱鬱

復南適今春重入都同住茂先宅橐筆入棘闈再戰迺

再北自此交益堅生死誓不易心同臭似蘭操苦介於

石伊余又適館相去路咫尺咫尺非云遠已若千里隔

一日不見君便覺愁思積高樹生曾雲虛堂晝昏黑豫

愁索居苦默坐但悽惻君今果遠行何時展良覲蚤知

有此恨寸陰亦可惜深情託長波回首念陳迹秋天皓



月圓夢寐見顏色

昔君年少日掉鞅雄文壇詞高何落落才大真槩槩使  
之入著作潤色必可觀謂當排閭闔直入青雲端豈知  
數不偶一第登天難論文三十年晚晚得冷官冷官亦  
何有騎馬褐不完猶勝風塵吏齷齪奴婢顏願君宜自  
愛慎勿嫌其寒祝君得善地大好湖與山生徒來問字  
濟濟玉笥班口講兼指畫著述垂不刊暇時訪隱逸詩  
酒相往還廢圃鉏花藥閒庭長芝蘭聽兒讀書聲快若  
水瀉灘此福世希有莫謂造物慳他年挈小舟訪君尋  
舊懽飽君苴勝飯飫君苴藉盤



君有莫逆友系出楚靈均鯢鯨運滄海雕隼盤丹垠我  
與同里閭欲交豈無因頗聞其爲人傲嫚不可親謁來  
始相見所見無其倫古權敦道義語默皆天真始知耿  
介士多受俗子瞋三上長安道潦倒長風塵萬金隨手  
盡一笑忘賤貧讀書務實用絕學通天人謂余後來秀  
忘年交分申銀河正案戶列宿光燦陳深譚忘寢食雄  
辯驚鬼神五嶽起方寸樹骨何嶙峋侵尋老去矣肝膽  
猶輪囷子今同舟去棲跡荒江濱遙看雙龍劍氣射牛  
斗津

寒禽宿沙際蕭蕭相因依稻粱各有謀羽翼遂差池公



等從此去余亦當奮飛豈不欲奮飛憐余未得歸高堂  
有老親名心安忍友且過春試去甘受樊籠羈繫豈余  
本圖寂寂竟何爲愁心繞南雲夜夜夢庭闈昨朝婦書  
來苦道寒與饑遑惜一身饑晨羞晡未炊遑惜一身寒  
所嗟兒無衣念此意忉忉涕下如綆縻敝袍苟可解典  
盡亦不辭明知值幾何饑寒庶共之附君書一緘中有  
菽水資匪曰菽水資聊慰倚閭思君歸拂征塵爲我敬  
柴扉高堂儻垂問爲我善致詞勿云客中苦恐傷慈母  
懷

君年將半百我年二十九辱君弟畜我遇事輒開誘君



德含沖和氣味若醇酒君才無不宜何止論升斗折節  
與余交毋乃愛忘醜相遺多琅玕欲報少瓊玖顧余雖  
乏才立志頗不苟揆天無尺量畫地有墨守君之所取  
裁得毋在是否忘形契分深披衷性情厚道義同肩仔  
瑕疵互攻剖旁人頗疑怪二耜爲一耦豈知兩人心相  
期在不朽百年有窮期此心知弗負今者送君行如失  
左右手方嗟辭明師陸心蘭師  
出守漳州旋悵別良友悠悠一寸  
心搖曳風中柳讜言日不聞祇恐益余咎新知滿眼前  
孰是交耐久世態如浮雲白衣變蒼狗熱腸向誰訴從  
此三緘口



簡鹿樵乞孟蘭餅

餅名見清異錄吳人中元日祀先必作之俗名茄餅

從君乞得孟蘭餅玉屑金鉞莫漫論  
領略飢盤風味好客中三度過中元

寂寂依人作遠游懷哉空唱大刀頭  
憑誰畫取團樂樣一片月明江上秋

登陶然亭次壁間盛蘭雪孝廉大士錢伯玉庶常  
寶琛韻

城畔荒亭一角孤登臨聊藉痠筇扶秋雲弄影痕  
深淺蘆雪搖空夢有無極目巉巖凌上界前身了  
了證團蒲卻來人外看人海絕似煙嵐萬變圖



擊筑悲歌調易孤  
醉來狂舞倩人扶  
愁生南國書難寄  
澹到西山影似無  
潑墨幾行留雪爪  
窮交多半隱菰蒲  
何當疊徧陽關曲  
重繪秋聲第二圖

九月十四夜月色澄朗旅館淒清因憶前年此夕  
在大梁與儕輩飲酒賦詩之樂倒壓其韻以遣愁

懷

十分涼意浸冰痕  
圓缺升沈莫漫論  
掠亂秋雲迷舊夢  
零星寒柝斷吟魂  
三年鴻爪驚蓬轉  
九月燕郊木葉繁  
愁絕梁園倦游客  
那堪回首望夷門

送譚蕩香上舍謬廷游涼州



燕市一尊酒別離千古愁風雲方慘澹君又去涼州絕  
域悲歧路寒威失敝裘

承平烽燧靜無計覓封侯

聊復依人耳長塗那足論防身磨古劍放眼小中原歲

月愁邊過文章塞外尊西湖有舊侶念爾更銷魂

時陸采三

周遠香  
客杭州

到日應除歲郵程記六千春風酒泉郡殘雪玉門天賢  
主傾心久慈親望眼穿千金如可致歸矣莫流連

故人星散風雨淒其兀坐挑燈寢不成寐

一夜風兼雨孤衾夢不成檐頭鈴鐸響都作別離聲天



意輕寒士人情重友生  
桑乾流太急嗚咽那能平

陽澤門內小馬圈是前明玉熙宮遺址

過錦排當想像中勝朝  
曾此建離宮一從鳧藻  
纏妖彗無復龍舟漾彩  
虹銅馬嵯峨籠曉靄玉  
蛾淒斷泣秋風惟餘寶  
月亭前月長向漸臺照  
綺櫳

頭痛

嘉樹移淮北爰居避海  
東搖睛驚積雪疏理怕  
當風檄想披裘讀鍼難  
用火攻迥然還自笑頭  
腦太冬烘

雪後偕孫廉甫明經成彥踏月玉棟橋

長安雪霽月滿天沈沈  
萬戶凝寒煙朱門繡闥  
羅管絃



醉飽酣睡吁可憐我生逸氣凌瀛壖羈栖

太液池西偏孫郎同舍玉雪鮮通眉長爪其神全俯視  
塵世紛腥羶相攜起踏瓊瑤田長橋互空虹蜿蜒闌干  
百丈白玉鑄橋東櫻殿埤圉圓古枯夭矯蒼藤纏飛雲  
北度瓊島巔窳堵波影垂白蓮五竿高矗捎珠躔玉虹  
金露址變遷廣寒遙想明璣璇趨臺南眺何渺綿稻畦  
漫漫無陌阡萬株雪柳迎風妍憑闌四望光皎然瑤華  
壓冰冰骨堅蟾輝孤朗三更懸寒波激射上下連金碧  
晃耀映玉淵空明世界涵大千置身恍在方壺邊徑欲  
駕鶴乘雲輶前招洪厓後偓佺翱翔九垓窮八埏謫仙



化去千餘年惜哉此樂無人傳相視大笑如雷顛擊櫟  
老卒車下眠驚起瞠眙疑真仙歸來坐參雪竇禪定中  
似聞金闕宣衍波重賦春寒篇

送竈詞

嬌女鋤童擁翠旂瓶盆樺燭薦芳馨婦爲無米炊原慣  
兒解譚詩跨亦聽熱不因人觚自踞煬甯有術夢難靈  
三年索食長安道老母尸糞鬢已星

庚辰元旦

春光十日動郊畿

天子齋居拱紫微維戊吉還兼午勝後庚期恰應



辛祈六街暎入香泥滑五穀精融瑞雪霏從此長安居  
大易年年臣朔不愁饑

行路難

行路難難莫難於上青天天門跌蕩蕩恨無六翮乘風  
驚泥塗踣蹙亦云孔艱下士俛俛行不得前行路難行  
躊躇問君此行胡爲乎逝偕計吏來

皇都都門迢遞三千里代步須乘薄笨車主人前告客  
官府有程額小車輪芻茭大車載櫬石催赴河工限期  
刻羸車不中程始敢私貿易一車亦需金二百客囊金  
少行不得况復前行到山左去年雪比江南大一餐費



卻兩縉錢人飽糠粃馬僵餓朝聞山路車輪摧莫聞湖  
路馬蹏隤朝朝莫莫輪蹏鐵碾盡心頭一腔血近傳黃  
流趨德州河伯憑怒蛟龍愁君看無數多錢賈到此還  
轅歸去休行路難難莫比只今

王道平於砥猶復難危有如此安得敷童律驅六丁填  
以息壤頃刻平盡挽河溜東南傾俾行者可以過行而  
耕者可以深耕行路難三歎息

天子宵衣正前席諸公勉進防河策

瓦研齋圖

并敘

沔陽張蓮濤

名錫穀乾隆  
己酉進士

令貴州之開泰甚有政聲



一日縣人薛紹瑄餽銅雀瓦研一述其叔文學某遺命以贈張公子者然文學故未識張侯也研形圓而質堅真贗不可辨背鐫圖圓二字下方刻曰儒林之寶聞出少鴻臚張公應詔家圖圓蓋其自號云張侯感其意以名其齋賦詩紀之繪圖徵詩

賢侯愛民如愛子不獨感生能感死垂死高人寄結隣世間投贈應無比訟庭闕寂晚衙閒繞膝芝蘭長玉階花間兒讀掀髯聽鈴下人喧捧研來滿堂傳觀皆動色金暈羅紋質蒼黑中有泉臺一縷魂千年不受風霜蝕背銘歷歷鐫圖圓薛生寶之完不刊遺言緘寄張公子



願效而翁作好官生與張侯未識面臨終乃遺銅臺研  
地下脩文限已催人閒茂宰心猶戀張侯感之繪作圖  
高齋寶氣照四隅悠悠生死知難報且看佳兒好讀書  
漳河日夜清波瀉鄴令風流誰嗣者託物聊酬似水清  
寄情甯在香姜瓦觥觥張侯政有聲三載行書上考成  
銀筆已看修治譜玉堂仁見起家聲丁令前知傳異事  
魏公卓識稱高誼郎君他日侍黃闈莫忘畸士殷勤意  
吁嗟乎總惟日落夜沈沈賣履分香淚滿襟英雄末路  
紆長算爭及酬恩一片心

三月十八日周鶴儕上舍筵招同周雪山榮鼎龔



杏村榮盛朗蒼泰符龐子方大塋四孝廉惠欽星  
齋兩同年汎舟通惠河爲補袂之會時鶴儕將南  
旋

買得蜻蛉一葉舟卻將婪尾補遨頭狎波鷗鷺偷窺客  
夾岸菰蒲豫作秋此去游蹤如退鷁果然吾輩是清流  
吳儂只合江鄉老纔上輕航便遣愁

紅闌綠柱翳篷輕宛似秦淮蕩槳行兩腳扣舷元易穩  
一心如水只宜平已排舵尾安茶鼎別繫瓜皮載酒鎗  
忽憶湖田喧競渡畫船簫鼓正縱橫

吾鄉三月廿日大  
小湖田競渡最盛

澄觀未證達摩禪漂泊江湖近十年三月三時如夢過



一花一葉動人憐多情蝶抱將離蕊無定雲隨不繫船

願得同游長健在東陽宿草已芊芊

丁丑春華慶屢約余同游人事牽經

未暇也今華慶已化去二載矣

傷春傷別似司勳怕見微風蕩縠紋輕燕有心尋舊壘  
游絲無力冒行雲離情潭水深千尺世態楊花薄二分  
聚散升沈彈指事不須怊悵倚斜曛

相攜畫壁到旗亭上牖濤聲不忍聽落日忽驚桃葉暗  
迴風時帶鯉魚腥狂傾東海翻波白冷笑西山擁髻青  
歸路輓紅塵裏去車鈴搖夢未曾醒

### 下第後作



蒼茫前路感臨歧又到花飛月墮時  
草草歡場春夢過悠悠心事水波知  
劉蕡計議紆長策羅隱聲名賸好詩  
同是銜泥雙燕子輸他先占最高枝

指鞠泉

四月十二日偕樵山駕部春嵐同年默生上舍及  
史生昆季重汎舟通惠河距前游才二旬許耳風  
物不殊儔侶頓散俛仰興感不能無詩

不盡蒼涼擊筑聲又來物外濯塵纓眼前奉米知難索  
身後傳書亦好名上客漫勞陳七發荒亭何處問雙清  
虛舟汎汎終非計歸去滄浪託耦耕

濯纓雙清二亭皆在通惠河側今廢

欲整歸裝路恐差清谿笑我未還家由來淺水無文鯉



自古淘金易揀沙莫羨空倉多雀鼠可知靈匹有匏瓜  
拂衣揮手辭公等準擬鄉關看菊花

匏瓜亭元趙參謀別墅也亦在河畔

今莫詳其址矣

銜尊坐對落霞飛柳色漫空不染衣花似有情暝復笑  
燕曾相識是耶非觴因流水三分淺春與停雲一例歸  
賸得蘆中窮士在江湖滿地欲何依

歡蹤宛似隔年期默坐悵悵有所思下第已如中酒後  
懷人況在落花時卽看此會都非故那卜重來更共誰  
寄語沿隄舊鷗鷺他時相見莫相疑



知止齋詩集卷第六

常熟 翁心存 二銘

古今體詩一百一首

起庚辰下第後由潞河泛舟南還道光元年辛巳赴戴可亭相

國約爲章江之行

四月抵南昌作

鹿樵閣讀觀察河東將行出家慶圖索題

廿年薇省領清班今日揚旌絳霍間  
移取全家圖畫裏終朝飽看太行山

看花鎮日捋吟鬚肯遣家山種木奴  
文學莫興鹽鐵論大夫不慣算鎚銖

新田土厚水泉清吉貝花開似雪明  
看取唐風如太古



家家燈下紡車聲

清粹溫醇玉不如一雙雛鳳過庭初三河年少知慚否  
好放羈鷹去讀書

虞山丙舍圖爲鹿樵賦

公叔達生死樂哉歎斯邱惜無賢子孫於此宮銘幽世  
人惑地蔭牛眠卜窀穸但解求福田豈爲安親魄縱能  
安親魄疇能安親心白楊風蕭蕭清晝猿猱吟縹緲虞  
山巔雲物神訶護云是鄉先生侍御張公墓公昔生存  
日山水託高情歸田謝軒冕騎尾返瑤京棘人走荒山  
麻屨踏幾兩何以慰公靈佳城得龍養

地名龍養基

左挹維



摩翠右瞰雙湖澄仙風吹浪浪海氣陽烏升千秋未闕  
山天留待公到日暮公靈歸忻然鑒兒孝公靈旣在茲  
公心喜可知墓門清泉冽丙舍天桃緋桃緋血染衣泉  
冽淚霑臆披圖靈風來微聞公歎息

我家有先壟迺在北山麓植立僵不仆形若槁死木貞

徽識力卓卜葬此地宜謂苟窮不濫吉亦孰如之

先貞節母

賈得王氏廢地卜葬兩世三棺形家僉謂葬此子孫且長貧先節母曰貧斯濫乎曰形若枯木僵而不仆先節母曰吉地也果然一脈延祔葬逮三世先人馬鬣封塋

遂定兆域焉

隧于斯閉秋風萎宿草春雨嘯杜鵑孤兒一滴淚何由  
達重泉灑淚向松梢裒裒不能去爽氣西山來遙遙見



公墓不得到墓下再拜奠一卮徒勞生景慕俛仰有餘  
思思我先君子與公契最厚論交輩行折置醴周旋久  
升沈雖殊致不隔神與形地下一執手權定如平生山  
麓雲沈冥山頭雲莽蒼四更陰火青靈旗照來往

成童我歸試值君廬墓時見君貌骨立負土十指疲弱  
冠我偏孤輿匱還鄉葬陽侯逞回怒失足駭厖浪君時  
直薇省不得磨鏡來丐君書銘蓋丹篆輝泉臺前年入  
京師示我圖一幅述德申孝思悽惻不忍讀屬我作詩  
句下筆且復休撫衷有隱恫夢繞家山秋荏苒遂三年  
旌旄莅鹽澤後會知何時甯敢一言惜子厚嗟芻牧子



瞻憶蜀岡彼皆遷謫士廬舍恐荒涼君今銜

恩命致身期報

國况展篋中圖宛見松楸色他年樹節鉞焚黃告墓門  
親恩何以酬努力酬

君恩獨我歎漂零饑走長安道望斷白雲深落葉悲不  
埽龍岡緩有待我待胡爲哉題詩涕漣洏觸我展墓懷  
送鹿樵觀察之河東

孟夏月初吉

帝坐明光宮

揮絃歌解臯殿閣來薰風



天顏辟有喜

溫旨宣臣鋪汝具練達才汝矢端恪衷汝職典絲綸甘  
載滋益共俾汝正鹽筴整豸巡河東汝其效汲黯坐鎮  
當要衝下毋奪民利上毋虧正供臣鋪拜稽首臣材本  
駑庸任劇虞隕越

恩重歸陶鎔願凜冰淵心願守清白躬載揚南風曲仰  
答

大造功

解鹽沒水灌畦必藉南風鼓盪而成

三河古都會河東尤沃土由來郇瑕氏國饒且近鹽鹽  
池十有八茲焉據其五廣袤百廿里膏液成澗鹵不煩



煎漑功不藉牢盆貯江淮及析津利藪安足數猗氏橐  
千金實由大腹賈土沃民不材昔賢豈虛語蟋蟀與山  
樞此風已成古庶幾勒令德或可比鄒魯勸君酒一盃  
開口向西吐蒸爲中條雲散作太行雨

天地開利孔顛倒億兆人役役爭錐刀奔走甯顧身強  
者日以厚積若邱阜屯弱者日以削散若瓜豆分不有  
司牧者疇能使之均周官重國寶虞衡必周巡藉彼造  
物富賑茲造物貧本以興民利夫豈曰病民漢立鹽鐵  
官乃自言利臣二十有八郡河東職尤尊後來廢或置  
議者徒紛紛要在識大體何損義與仁畦戶力宜卹蠹



商法必伸行見真鹽鐵澤被三門津

鹽澤紀山志鹽池詳水經挹注終不竭紫色常澄渟黃  
河從天來勢若屋建瓴千里始一曲融此奧衍形有利  
必有害消息驗物情惟當護隄堰力與客水爭主水患  
其涸客水患其盈水盈鹽易敗水涸鹽不生宜受南谷  
水水清鹽迺精宜捍北谷水水濁鹽難成霰霖時一潤  
顏色逾鮮明淫霖或不止汎濫防縱橫靜言觀物理政  
理可以平不見包孝肅一笑黃河清

孝肅嘗爲河東都轉運使

析利如絲棼鉏奸似茅拔苟能探其本奚暇察其末顛  
鹽賤易售煎鹽利每奪奸民逞私販那復顧刑罰此輩



無藉徒厭魁多大猾揮金結死士狶突乃竊發聯翩過  
關隘去若箭離筈豈無兵與吏拱手不敢詰可憐蚩蚩  
眈升斗求苟活捕以塞考成鴻麗魚網設曩者客胸陽  
此弊久深悉惜無尺寸柄攬腕憤所切類鑑直賤而質良私販獲利尤  
厚余幼時在淮北知之最詳河東地大物博梟販越界以售者且下達江漢矣君今秉旌旄節  
制更遼闊盟津波潁洞峭兩峰截梟地大槩芽生乘閒  
或出沒欲期刑無刑先貴殺止殺

峨峨龍門山滔滔橫汾水絕學應運昌篤生文中子太  
平十二策天下可坐理薪傳得房杜不聞私福時麾蓋  
西南行行當過其里念君與先人契分差可擬鰥生讀



父書如括譚兵耳光範三上迂悲歌倚燕市贈君詩六  
章灑灑動盈紙芻蕘儻可采幸無營蒯視送君渡桑乾  
余亦南歸矣瓣香告先靈九原定欣喜未知後會時面  
目各何似驕陽蕩埃氛福星爛紺紫仁風一以扇炎暘  
霍然起和羹術可試報

國從茲始

長歌一篇贈伯秋坪廣文文熙

秋坪自稱六不居士謂不論命不談相不持齋不佞  
佛不服藥不作居間也亦可見其定力矣

去年識君人海中尊前一笑當春風今年同客平津邸



我累豬肝君置醴相逢意氣皆雄豪落落寡合真吾曹  
味從澹處得至味如水投水非投醪金蘭已成莫逆契  
爾汝遂訂忘年交揭來一編手示我語到真摯無牢騷  
人生百歲如奔電祿命無憑孰貴賤顯官端由似筆頭  
封侯豈必如川面天食法食疇則能卽佛卽心我何羨  
副肌剗脈少十全覆雨翻雲每千變先生知命能安貧  
先生脩髯貌絕倫心齋久已淨六塵奉佛言謹事二親  
魚羹救疾誠通神大還鍊得能保身卅載旅食京華春  
袁絲灌夫走且踰六者先生宜自號先生捧腹壺盧笑  
空諸所依法自然羅顰角根觀道妙先生汪汪千頃陂



淵乎孰得窺其涯有威有儀洵可則亦夷亦惠無不宜  
衣冠肅穆事邱嫂詩禮誦習傳佳兒鈔成薈萃書百卷  
鄭虔有道真吾師升沈世事胡可說智者徒勞巧者拙  
夷曠何煩送五窮文章早見誇三絕卽今伏日蒸炎氛  
那有懷肉遺細君披袵厯厯數疇曩夢痕零亂飛春雲  
贈君狂言詩一首轉瞬秋風惜分手他年飮君苜蓿盤  
定須醉我茱萸酒

過圓通觀鞠泉庶常寓齋偕程春海編修恩澤坐  
小亭夜話

日暮陌塵合華轂紛交馳出門散幽慮孤詣何所之祇



林訪良友寂莫同衿期嘉賓亦戾止邂逅瞻風儀滅燭  
坐小亭林木陰蔽虧竹石泣清露欄檻拂曾颺涼蟾鬻  
雲葉幽蟲吐秋絲既欣囂萍隔彌動江湖思太史隱朝  
市矯矯鸞鶴姿鴻才不世出風雅真吾師淵源導經史  
金石鏘文辭書工大小篆術擅俞盧鑒高譚霏玉屑逸  
興揮松枝商推到今古中且忘其疲伊余秉微尚抗志  
慕振奇所惜乍相見俄頃成乖離起視心房星冉冉西  
南移浩歌分手去此樂無人知

擬何處難忘酒

何處難忘酒長安下第時已隨芳草歇生怕落花知神



駿空圖骨春蠶未盡絲此時無一盞何以解愁思

何處難忘酒朋儕意氣高忘形相爾汝直道在吾曹歲  
月過中聖心情託孟勞此時無一盞爭識酒人豪

何處難忘酒看花燕市中泉分草橋碧雲繞石壇紅羅  
帕絨詞麗銀盃度曲工此時無一盞何以謝春風

何處難忘酒無聊獨倚樓高標淩落日放眼小齊州西  
北軍都峙東南碣石浮此時無一盞爭釋古今愁

何處難忘酒頻年面目枯養生求藥餌飽死笑侏儒誰  
買相如賦真窮阮籍途此時無一盞何以慰饑驅

何處難忘酒三隨計吏車中年仍作客好夢不離家鄉



國音書斷高堂屬望賒此時無一盞爭得滯京華

爲史生昆季題棣華山館圖

梧桐生朝陽棲託地不卑喬木敷遠蔭鬱鬱蟠高枝由  
來重簿閤非爲誇門楣去天尺五近雨露恩常滋見聞  
易以廣學業易以恢豈如王謝郎烏衣事游嬉史佚有  
賢裔家枕邗江湄一經世德衍七葉清芬垂鍾毓得偉  
人望之文章動上台堂前三珠樹交映生光輝伯也振  
麗藻仲也秉軼材季也啟夕秀各各凌雲達讀書共一  
室協律調塤箎中庭常棣華鄂不何葳蕤春風飮駘蕩  
融融復怡怡君家在南渡蟬冤聯清徽甲第互四明澗



天華九題繡衣橋嶽窠碧沚波漣漪石室夾山澤霞嶼  
連虹霓流風幸未墜紹承庶在茲碧梧與翠竹能稱其  
家兒浮辭芟枝葉敦行睦本支根茂實必遂努力光令  
儀繫余一日長抗顏而爲師深感置醴意願更申其詞  
三子託乾蔭况值

承平時脊令行有序籩豆靜不違闕牆禦侮事明知固  
無之可畏不可恃能勿深長思葛藟芘其本蔦蘿吐其  
絲榮榮者門子磨錯愼自持晨葩戒點辱潔白娛庭闈  
華萼亦有集棠棣亦有碑他年歲譽處載廣裳華詩

史生悠辰讀書說劍圖



書足紀姓名劒僅一人敵英雄欺人語難信一事不成  
殊可惜史生嶽崎厯落之奇才逸軌不受繩尺裁投書  
屢過朱亥市仗劒時上燕王臺爾來折節幡然改青眼  
高歌看人海吐鳳已驚文筆成屠龍尚有豪情在空山  
八月飛秋濤三更銀燭光搖搖開軒據案弋綈袍壯夫  
旁侍頭虎毛長吟動壁鬼出聽拔鞘憑檻天爲高縱譚  
連挂少府鹿快意徑斬長橋蛟生才雕龍貌青兕目光  
爛爛巖電紫會誦周官繹桃氏進賢櫪具稱上土方今  
六合無泥滓况復文通世濟美勉旃稽古登膺仕忠孝  
皆從讀書始莊生十九寓言耳三劒何勞獻



天子二十萬言貯腹笥一箇壺盧括青史慎勿干將誤  
補履百鍊剛須柔繞指嗟余蹴躋塵埃裏書劍飄零少  
知已多事南華記秋水屢擲不中吾歸矣歸時擬賃瑯  
嬛游囊空無貲彈蒯緱秋江間把離騷諷應有寒芒射  
斗牛

將歸述懷

子規嘯罷喚桑鳩悔煞頻年事遠游極望更無雲在眼  
高堂况有雪盈頭馮諼縱使營三窟溫嶠終居第二流  
聞說慈烏能反哺冥鴻空作稻粱謀

張韻谿上舍定球以詩贈行依韻酬之



不多時候坐團樂節序推遷感素紈燭影搖紅裁錦字  
酒痕分綠上絲單華年脫手黃金彈舊夢當頭白玉盤  
卻怪嫺皇太多事苦將沙土把人搏

潦倒情懷不可論白雲回首了無痕花因薄命方增豔  
人到窮途易感恩舊雨飄零憐斷梗秋風歷亂轉孤根  
心香一片燒都盡煙滅灰銷那得溫

碧甃僊闕畫夫容知在靨霄第幾重五色日華銀海眩  
三山風緊玉壺封世情已似秋光薄歸興還如酒味濃  
試向支硎最高處梅花應自識孤蹤

折花起舞且忘憂笑指桑乾日夜流如此長貧猶作客



况兼思士易悲秋三年似我甘漂泊一樣依人任去留  
幸有鷓鴣裘未典勸君休唱大刀頭

粗豪結習媿吾生耿耿心頭一事橫漸覺鋒鋦隨分減  
未知肝膽向誰傾論交氣味須求澹傳世文章莫近名  
願保晨葩無點辱相期白水證前盟

出都

遠歸當忻然今我翻不樂蹉跎竟若茲悠忽復如昨元  
音旣已微大雅何時作識曲遺鳳簫諧聲賞牛鐸徒歌  
甯戚魚疇薦彌衡鶚窮於鮒噓沫拙甚燕巢幕長安冠  
蓋地俸米知難索浪游走梁宋放眼小河洛清漳波瀾



洞太室峰岵嶸頻歲曠遲迴吾生終寂寞敝裘增蒙茸  
寶劍斂鋒鏑交游唯酒徒商權祇飲略身名媿蕙微世  
味似紗薄悠悠一寸心契闊向誰託早知久無成悔不  
理芒屨沿洄足煙波登陟健腰腳萊衣及時製阮禪猶  
可著伏臘對妻孥池塘燦華萼時時讀異書稍稍采大  
藥胡爲雨失據生理甘漂泊念彼力田農蓀蓀求厚穫  
仰視隨陽雁銜蘆避矰繳霜輕欺孤花風勁卷飛蓬極  
目望秋穹浮雲莽寥廓

通州

樓船輻湊氣如雲控引江淮接海濱南北重城闐闐合



東西二水路沽分治河自古無長策轉漕何人奏上勳  
安得通渠開鄭白神臯沃衍盡耕耘

登舟

自笑吾生未有涯三年空悔客京華乍聽鄉語渾如夢  
舟子纔上輕航便似家壯志秋風吹落葉歸心涼月送  
吳人飛霞還山已準重陽後叢桂應留數點花

潞河晚泊雨

勞筋久已厭緇塵上得輕舠自在身惟有西山猶戀我  
故將風雨送行人

電光瞥似金蛇掣雲氣昏如潑墨濃絕肖夫容花萬朵



一匳鏡裏一夫容

霜鬢零星不可梳  
風來面面水窗虛  
京華舊夢都如洗  
不獨煩衿一掃除

河西道中

潮回風定晚涼初  
水色雲光接太虛  
新雨白黏蘆絮溼  
夕陽紅帶蓼花疏  
北來細數雙雙燕  
西上難憑六六魚  
屈指歸期知不遠  
無繇重寄數行書

天津遇雨

煙霧破空冥扁舟鎮日停  
風翻楊葉白雨蹙浪花青天  
地滄波闊魚龍水氣腥  
乘查如有路吾欲汎東溟



東光夜行

隆隆風打頭曲曲水如鉤落月猶西駐清漳正北流燈  
明漁浦夜波漾蓼花秋客子歸心急孤檣歎滯留

臨清道中微雨

推篷涼氣襲單衣煙樹冥濛拂釣磯舊雨好將今雨續  
清流常比濁流微魚游淺水難求食鷺集空灘亦倦飛  
歸去黃花應未過紫葢猶嫩蟹初肥

分水龍王廟

汶水向西流禹力豈不到原其施功初順性因利導後  
人救時變尺寸紛穿鑿涓涓一綫流乃用資轉漕沙土



易滲漏千里那不耗元人築堦城高下已顛倒卓哉宋  
康惠智勇力排冦遏之出南旺地勢據其要水均測南  
北如以權衡較遵循三百年利涉有成效水性本就下  
可濬不可拗當時雖順軌積久終橫暴北流達臨清曲  
折通輿窅安山湖旣湮漳衛土多淖每逢亢旱年舟楫  
易淺膠南流會沂泗湍急勢騰趲况復匯衆泉橫溢苦  
秋澇魚臺滕沛間每以偏災告北流日以微南流日以  
劇蓄泄徒區區疏浚祇稍稍

至尊深焦勞俊父在

廊廟成法貴變通防患宜豫料我乘扁舟來俛仰發長



嘯懷哉神禹功謨貢聖所誥

昭陽道中

淺渚寒魚已可叉湖邊菱芡足生涯荷衣新製裁雲錦  
蘆被奇溫聚雪花漁子權牽船上岸居人多以水爲家  
勞筋羨煞煙波趣兒女團樂笑語譁

我欲移家此卜居浮生汎汎水中鳬山妻進號稱蠶室  
賤子新銜署釣徒有酒可沽聊復爾得魚不賣盍歸乎  
他年此願如能遂不效知章乞鑑湖

放舟惠濟牖

長淮東去波滔滔黃流南匯雨水交馮夷咆哮支祈怒



地軸撼動天關搖淮南十郡俯可數一瀉杯水傾堂坳  
溝通江淮昉自古用以轉漕始勝朝層層建牐禦衝突  
重關疊鎖何堅牢邇來黃河日淤墊河身還比城頭高  
淮流側過不得出建瓴南注過林梢我來過牐正九月  
水落石露痕全消放舟徑下勢剽疾如箭離筈雕離巢  
雲峰低昂拜石燕員嶠震動鞭靈鼇盤渦眩轉鵝鵲散  
殷雷鬱怒鼉鼉驕百丈萬牛挽不住舟師絕詔與人號  
霜花掠眼電煜煜金罇聒耳風嘈嘈平生逸氣頗自負  
到此斂盡不敢豪回看牐口匹練合但見歎薄冰珠跳  
入險出險魂未定性命真覺輕鴻毛今年儀封口未築



河流盡趨潁毫郊清淮暢出盛怒減此間行旅無停橈  
頗聞礬山水漲候懸流十丈飛洪濤舟楫碇碇立齋粉  
螻蟻微命何由逃不見緣隄沙草際斷篙折勝縱橫拋  
國家正供歲歲有全恃一綫轉萬艘導淮南下非得已  
宣防時煩役鼓礬危厓仍復屢蝨陷哀鴻徧野鳴嗒嗒  
決排疏淪兩無策

聖心日夜深焦勞吾儕行役敢憚險空誦瓠子塞長茭  
茲行過牖已五十寸寸似挽琬弓弨及此適意弄清快  
蘆花如雪波光搖楚州城下過九日細酌香醞持霜螯  
揚舲擊汰渡揚子擁被臥聽邗江潮



將之江右留別家人

辛巳

纔得還鄉國飄然又遠遊  
春風二三月孤櫂向南州  
歧路誰青眼高堂况白頭  
故山叢桂好歸計肯淹留

雨中放舟

窺人雛燕語危檣細雨如絲  
隸柳塘別緒暗隨春水長  
游蹤還比落花忙懷中岸漫然牛渚  
夢裏風難借馬當  
今夜莫邪城畔過恐教匣底嘯干將

嘉興道中

杉青牖下艣枝柔纔出江南到秀州  
半邏花濃鶯滿樹  
重湖風定客迴舟斜陽欲下撈鰕渡  
春水初生放鶴洲



知不足齋叢書卷之二  
且買新塍一壺酒三更閒倚月波樓

雉堞參差俯澈汀桃花里接菜花涇劇憐春漲三篙綠  
不見煙嵐一髮青樵徑斜侵買臣墓蘿陰涼上語兒亭  
流黃莫漫當窗織無數鴛鴦睡未醒

石門

吳會原同壤春秋此作門霸圖當日歇廢壘至今存偶  
獲夫椒勝渾忘檣李冤潮痕通骨母嗚咽寫忠魂

過湖州

繞隄桑柘午陰圓來泊吳江赤馬船綠蟻傾尊判一醉  
紅蠶上箔正三眠下塘春水明于鏡上若殘花碎似鈿



我媿才非狂杜牧不須惆悵怨芳年

峴山亭下俯晴波露薤淒涼喚奈何一笑洞庭當北戶  
千秋遺躅感東坡誰從水閣尋耒老欲著煙蓑學志和  
更選茗谿深處泊白蘋風起聽漁歌

風雨舟發錢塘江

候潮門外綠波柔微雨微風送客舟兩岸天分吳越界  
六時濤洗古今愁西興煙樹三春暮南渡江山半壁收  
賸有孤標羅刹石肯教容易向東流

富陽江上

曉日瞳矓過富春嵐光波影碧粼粼江流曲折初成字



山徑微茫似有人好倚長鏡閒采藥且尋磐石坐垂綸  
行蹤底事如蓬轉不及優游自在身

清波難翦亦難描峰轉帆迴路又遙雲壑煙青燒榭葉  
荇苗春碧插魚標向來歲月同愁長如許江山要福消  
何日移家此間住好將蹤跡溷漁樵

桐廬道中

新詞唱罷柳耆卿漠漠桐江畫未成疊嶂似從天際落  
扁舟疑入鏡中行襲衣空翠深于染如夢煙鬟數不清  
最愛一泓澄澈好塵心洗盡眼俱明

苕苕萬朵碧夫容一朵夫容影一重百道飛泉新雨沁



千盤危磴古苔封，雲光映水天然媚。  
山色深春分外濃，欲訪桐君丹竈室。  
依稀猶在最高峰。

繡嶺丹崖爛若霞，滿山紅遍杜鵑花。  
似聞樵唱成三疊，不辨雲坳住幾家。  
圖佛定須由慧業，學仙未必駐韶華。  
何如領略江天景，長荷煙蓑撥棹牙。

### 富春

海門潮上吼晴雷，打過桐廬浪便迴。  
千載雲深孫策壘，三春花滿子陵臺。  
中台星宿遺孤客，絕代江山感霸才。  
我向邯鄲游已倦，一雙醒眼越中來。

### 七里瀧拜嚴先生祠



西京盛文物士氣久頽靡紛紛獻符瑞名節埽地矣新  
莽乘其隙炎運遂潛徙真人起宛雒恢復興漢祀咄咄  
嚴子陵相助乃爲理列宿依日光碌碌因人耳客星獨  
孤明堅臥不肯起采藥桐君山濯足富春水一絲重千  
鈞藉茲振綱紀斯人識廉恥端自先生始東漢獨後亡  
實賴國多士峩峩雙釣臺高並九鼎峙不然光舊物豈  
與易代比故人雖高尚敢不臣天子徒思仰清風烏足  
達微旨

東巖懷方處士

新翻花樣鬱輪袍孤負年年西笑勞天與清才留缺陷



人憐寒相識皮毛生前落魄諸公誤身後榮名一代高  
欲解先生長隱意桐江東去水滔滔

西臺弔謝臯羽

陰飈倒卷桐江水落日沈沈呼不起狂揮如意發哀歌  
竹石一齊敲碎矣古來亡國亦何限不信天心忍如此  
謝后僉名降表中趙家塊肉鯨波裏壘山死上都文山  
死燕市義旗吹散沙蟲飛一縷孤臣心未死酒酣獨上  
嚴陵臺峰合谿深草木哀漢朝災運尚重續宋室南遷  
竟不迴君不見會稽萃律陰房闕攢宮曾是中興地玉  
匣珠襦化劫灰六陵慘澹銷王氣幾樹冬青向晚凋斑



斑灑盡遺民淚我來弔古羣山橫耿耿心頭氣未平子  
規吮血清猿和猶似忠魂慟哭聲

登釣臺

繡嶺環如屏桐溪淨於掌沿瀧積陰森攬勝得高敞周  
旋理芒屨躋陟策藜杖探身踏蘚危拾級捫蘿上嵯峨  
峙雙臺逋峭落千丈凌空躡高標心目一以廣振衣坐  
磐石天地任俛仰俛聽長松濤仰挹層霄爽江流正孤  
鶩雲氣倏萬象聊擴寰中觀永懷物外賞昔賢雖不作  
遺蹟尚可放每期出世蹤得遂餐霞想逝將攜妻孥泛  
宅蕩蘭槳此願儻可酬何時脫塵鞅坐久契天真澄觀



息擾攘暖暖露村墟沈沈視林莽前峰人語微絕徑樵  
斧響時見鷗一雙衝波自來往

舟中雜興

聽風聽水去閒倚上灘舟秀嶺皆南拱清溪自北流  
聲春夢碎煙色破春愁不盡蒼茫感悠然四望收  
平洲沙渺渺夾岸柳依依雙鳥向山沒孤帆衝水飛  
童眠犢語野女踏花歸春事闌珊甚尋芳與願違  
路轉風無定崖欹水尚春雲根何日削石室幾時封  
春入三巖秀花開九朵濃龍邱如有宅吾欲躡高蹤  
安穩過回湫前頭又急湍石斜橫柁礙風緊著篙難百



丈牽猶滯長年力已殫茲行尚如此况乃贛江灘  
風煙開漠漠前路正悠長向晚微雲合清歌小海涼結  
茅安水碓壘石作魚梁羨簫居人樂浮生有底忙  
野氣微茫白漁燈隱約紅落帆宿何處宛在水當中晚  
飯燒春筍吟詩掩短篷夜來欹枕聽風響尚隆隆

過龍游

姑蔑旌旗在千秋尚有城林間雙塔迴雲外九峰明風  
急帆無恙濤奔石作聲朝來行百里水驛已兼程

爛柯山

一闕仙歌聽卻迴斧柯爛盡已成灰何如夢向鈞天去



只抵人間六日來

天上羣真底事忙看栽黃竹又栽桑千塵萬劫須臾事  
莫羨仙家日月長

衢州道中

獨倚東陽上水船女樓飛舞儼臨仙分明山水清如畫  
人在青霞第八天

燕泥啄盡草青青閒上春風卷雪亭一陣落花紅雨過  
游絲飛入綠楊汀

細石平沙水拍隄輕颿直上定陽溪綠籬支竹通幽徑  
中有黃鶯恰恰啼



晴波蕩漾碧粼粼波面東風著意皺不信出山泉水濁  
清溪十丈見游鱗

不羨人間萬戶侯木奴輸絹擁千頭神仙那及商山樂  
一局殘碁算未休

茅檐煙散柳藏鴉水碓無人靜不譁忽憶今朝寒食節  
始知身又在天涯

次弋陽

垂楊隄畔繫輕艘淺漲初平弋字江鷗國涼侵孤枕夢  
篷聲新換故園腔空餘石室困三百那乞良田畝十雙  
便向箬谿垂釣去春風吹綠滿魚缸



逆風

中流橫柁氣如雷對面艤艫翦浪開寄語來船休得意  
昨宵我亦順風來

鄱陽湖畔

居人占地得湖喫湖面無租不計年竭澤用麋還用鹿  
肥甘宜稻亦宜秬桔槔手轉如蛇蛻笊簍中空集鷺拳  
莫笑浮家無樂事一生衣食在漁佃

魚鷹鎮日爲人忙啄得鰕鮓未許嘗荻渚周遭雲萬疊  
漁莊宛在水中央風前自曳煙蓑影沙際猶沈畫戟芒  
遙指康郎山色好忠臣祠廟已荒涼



水宿

水宿依湖岸愁多客思紛雁歸彭蠡月春盡大江雲野  
氣空濛合波光上下分青衫知早溼休更撥鷗筋

春暮感懷

落花如雪舞迴汀九十春光一夢醒南浦有情依舊綠  
西山無語向人青蠶因食葉方抽繭柳到飛綿又化萍  
別有幽懷誰與訴夜深頻看斗牛星

食鱖魚有感

兩年客大梁飽喫黃河鯉狸肪及鳴刺浪得虛名耳光州  
產果子狸固始鵝鴨最肥中間走長安臣朔饑欲死易酒常苦酸冰



鮮不盈簋區區換羊書肉食一何鄙彈鋏歌無魚徒倚  
過燕市幽夢落江湖煙波渺千里平生垂釣心寂寞竟  
誰俟飄飄天際舟肅肅秋風起三吳稻蟹熟九月莼鱸  
美時能潤饒叔了未動食指今年游洪州峭帆溯江浹  
左蠡多鰖貽尋陽足鱸鮓風味吾鄉同客懷差自喜梅  
炎南浦蒸舶趁風邈迤鱗魚初出網轉販集雕背把錢  
趁槩牙冒雨蠟屐齒入選提筠籃歸烹洗蘭綺紛綸雪  
落碁羅列薌凝几胸腴截玉白鱗甲燦星紫老饕朵我  
頤不食五年矣刺喉遑避鯁扶腦不遺懣中置忽三歎  
歎亦胡爲爾撫茲時物新動念流光駛悠悠寄鮓思蒻



蓮白雲裏他鄉雖可樂那忍缺甘旨素書夫何云涸轍  
竟如此逝將貸監河儻激西江水

尋孺子亭廢址

并敘

孺子宅際湖南小洲上見水經注唐宣宗時塘東有  
三亭曰涵虛曰孺子曰碧波乾符中俱廢曾南豐爲  
守結茅爲屋圖孺子像祀之嗣後興廢不一曰宅曰  
亭曰臺皆卽其處而世易其名余至南州訪求遺蹟  
第見土垣頽缺破屋三楹臨湖亭址徒想像於荒煙  
蔓草間矣昔賴濱作詩尚歎息於汝南之未祀今乃  
并先生之祠而廢之耶表章獨行風厲當世良有司



詎無顧士則其人者與

東湖南畔草成堆千載祠堂付劫灰不信有人能下榻  
至今遺宅只荒臺碧波深夜留明月白社晴江轉怒雷  
爲語當途陳仲舉好分清俸翦蒿萊

游普賢寺

并敘

寺在惠民門內晉故禪居寺隆安四年武昌太守熊  
鳴鵠捨宅建唐神龍元年改爲隆興院會昌間觀察  
使裴休迎黃蘗山希運禪師居此南唐保大二年袁  
州刺史邊鎬以鐵二十萬斤鑄普賢像寺遂以名明  
永樂中重建大殿以枅木爲之近燬於火惟像獨存



豫章城頭舶趲風沿街拍手喧  
僮獨居鬱鬱不快意  
幽探徑趨梵帝宮入門頓覺氣蕭索  
榛蕪塞路披蒙茸  
隕垣崩圯厝寶鼎焦木零亂搯洪鐘  
綠房依稀劫灰後  
紺宇想像飛煙中  
龍神八部亦何有一炬盡付空王空  
就中普賢像端好屹立不燬摩蒼穹  
星豪月面塵土翳  
丹脣青目食煤蒙白蓮照灼失光豔  
玉象蹴踏開雲霓  
合掌頂禮發三喟妙理變化真難窮  
吾聞此像鑄五代  
袁州刺史參元戎  
靈關重啟追勝蹟  
璿璫珠網雕玲瓏  
更摹寶相範金壁  
廿萬斤鐵合冶鎔  
大衆讚歎得希有  
莊嚴圓滿天人容  
是時閩楚並割據  
東西窺伺方交訐



邊侯受命制閩外發宏誓願酬恩洪果然所向輒摧破  
十載竟以功名終削平二國關疆宇洵由慧力非人功  
邇來又閱千餘歲坐鎮息壤降蛟龍二禪天已火災滅  
威德那不抗祝融得毋智燈自吐燄廣揚法炬驚愚矇  
是空是色想非想現身指示施神通老僧局上劫甚急  
有二僧叩之不答兩耳聾拂衣大笑出門去西山落日  
弈方酣  
銅輪紅

藥師院看新竹

江雲帖帖南浦飛江城清夏晝掩扉鄙人生無肉食相  
冷嚼冰雪骨不肥尚餘一點俗緣在妙藥欲仗空王醫



芒屨徑踏藥師院沙路細碎行人稀深篁蒼綠掩金碧  
煙外但聞清磬微斂扃拄策得幽徑墜粉簌簌沾人衣  
龍吟鸞嘯衆仙下琅玕萬个羃四圍連天一氣碧雲合  
不知林外停炎曦移時靜對坐磐石橫出旁茁無不宜  
嫩黃便娟態嫋嫋空翠匝匝香霏霏玉聲玲瓏風解簾  
金影瓌碎波含漪初生勁節不數尺鬱鬱已具千霄姿  
脩柯似放一頭地轉以側勢相撐披山僧頗解禪悅味  
留客且住攜軍持洗鉢細烹葉上露兩腋習習清風吹  
內觀了了見癥瘕如飲大藥調上池渭川千畝貯胸臆  
千戶侯吾不願爲癡心思乘籜龍醉呼童斲取摑載歸



寒酸笑殺白司馬苦竹遶宅哦新詩

游百花洲追和錢香樹家覃谿兩先生韻

漠漠輕陰覆柳塘橫波略約度紅牆隄邊花雨零星斷  
水面荷風自在香無定雲心隨去住忘機鷗夢識行藏  
何當蕩槳披煙笠招取江城五月涼

枕流壘石點苔斑城市偏饒物外閒積雪百年無此作  
楚僧心壁結茅東湖之憩雲菴一日朱漫堂先生譙百  
花洲酒酣易服權小舟而游疏林掩映露一小菴積雪  
覆戶一燈熒然宋稱游客促高風千古有誰攀左爲蘇  
雲卿蔬  
膝譚詩孟茗醉遂爾至曙  
園俗名三洲蘇圃乾隆四十二年禽魚自得濠間樂冰  
巡撫海成築隄以通之改亭爲祠  
玉相看鏡裏顏絕勝秋屏與滕閣好從水外望西山



小飲湖畔疊前韻

招攜行散過回塘  
帘影臨流拂短牆  
濁酒法傳柑子釀  
新茶味作豆花香  
漁舟唱晚不歸去  
水鏡涵空無盡藏  
坐久渾忘天欲暮  
憑闌祇覺袷衣涼

愁絕清歌雉子斑  
乾坤能得幾人閒  
杏陰空歎風流歇

杏陰小隱居明洪武中黃德文所構朱善有記  
桂樹誰從月窟攀  
湖對貢院是日郡太守試

此士於新漲碧波添渴酸  
夕陽紅影上酡顏  
榆墩蔬圃荒

涼甚  
徐巨源榆墩亦在東湖畔  
但見城頭一角山

佑清寺尋馬祖道場

喫肉乃是中丞祿  
不喫也是中丞福  
福祿如何修得全



日活千人噉斤肉老僧微笑豎法幢不下轉語心已降  
豐千饒舌太多事一口且試吞西江箭鋒休矜第一義  
才上初桃未離地圖名那比圖佛難選佛何如選官易  
我昔夢中參戒壇本師授我青琅玕身輕乍著梅花衲  
一點靈臺了了觀我時繙經高座上我師掉頭不相向  
讀盡瑯嬛萬卷書方許汝窺祕密藏前生曾見宰官身  
重到塵寰三十春自從一腳當心蹋翻作東西南北人

寫韻軒

在惠民門外紫極宮仙人吳綵鸞寫唐韻處劉辰翁  
虞集皆有記



茗蕤飛閣俯重闌聞說星妃此降真未必情天能免俗  
本無仙子不長貧金銀氣識樓臺幻珠玉香留翰墨新  
若道瑤池多富貴蛟綃潛織又何人

一髮西山碧似煙塵寰小謫自年年應從歷劫方生慧  
解道憐才始是仙上界花明秋不老下方人定月初圓  
瓊機莫羨天孫巧浪費黃姑二萬錢

甲帳虛寒百感生碧桃開徧古情城

綵鸞好種碧桃丹桂四時開花古情

城見豫章古今記

研中秋露三銖薄挽底春雲五朵輕玉鈴量

絲星界細

虞集記子凡見三四本皆硬黃書之紙素瑩潔界畫精整

金刀裁葉霧綃

明

黃庭堅跋張持義所藏綵鸞唐韻云凡三十七葉唐人所謂葉子也

長生不寫刀圭訣



應怕天機泄上清

法苑珠林本行經

陳宏緒寒夜錄彩鸞曾游安成福聖寺七日寫法苑珠林百二十軸又寫

佛本行經六十卷於導江縣迎祥寺

殘縑斷素想芳馨書成鸞鳳窗前下

吟罷蛟龍檻外聽江雨千年人寂寂天風五夜韻泠泠  
仙蹤應逐飛霞沒攝去休教恨六丁

南楚三首

南楚蛟龍窟西江瘴癘天由來尚祲鬼更喜說神仙獻  
罷婆娑舞歌殘囉噴篇淫祠古有禁吾憶狄公賢

旁礫儀仍在祈年禮豈無如何陳盛設祇爲飽淫巫功  
德誠宜報嬉游或太誣鄉風安足怪所恐惑羣愚



禳除逢惡月競渡弔靈均吾土誇金寶斯邦信鬼神因  
過章水曲轉憶尚湖濱更俗須循吏誰爲第五倫

賽神曲

豫章城中過端午萬鬼行空日亭午朱符綠艾影交橫  
列市如墟掩門戶滿城不聞雞犬聲但聽統如打柘鼓  
前傳葩後振羽巾童跳振子舞福我壽我我福主統率  
天兵八千部訶禁不祥孰敢侮攔街迎來奠酒脯我祀  
孔虔毋我怒溫司馬黃司空平浪侯晏公傳聖毅鬼雄  
二郎神傳蜀守子八角廟報番君功蒼梧死作觸轅語  
白馬生入蛟龍宮千秋萬載英靈在西山白日號陰風



水鬼巫支祈火鬼宋无忌澤鬼委蛇竈鬼髻速去遞藏  
勿爲祟後者爲糧神所餌慎莫近前效兒戲吹竽擊瑟  
敲銅鉦鑪香雙裊日月旌麾幢羽葆壯士擎七寶蓋纏  
珠珞瓔神貌或端好或猛操弧撫髀兩顴頰兩夫鼻舉  
彳亍行舉以麻約微作聲昇者距躍卻復迎低昂左右  
穩不傾黑煙暮合火珠迸萬家爆竹春雷轟靈脩眊鬼  
圖鬼狀畫紙翦出龍船樣黃帖催徵香火錢日日排門  
索供養夜來三市繞城趨動地謹呼沸天唱攝取煩燒  
向此中疾走江頭付火葬四更火燼光熒熒寶露香飯  
灑淨瓶瘞鬼攫食形伶仃紙錢帖地灰血腥靈駕歸廟



陳芳馨兩行列炬燦若星神來肅然風泠泠酒盃澹澹  
燭燄青老巫披髮搖巨鈴大衆闐寂側耳聽白羽一麾  
萬鐙滅苦霧四塞雪沈冥吁嗟異俗客莫笑金谿更有  
青蛙廟

試雙井茶和山谷送東坡雙井茶韻

南州暑溼不可居聶腳重脰坐讀書蟹眼湯點白芽細  
一啜快得招涼珠燕支羣婢媚骨腴燕趙絕色乃不如  
人間美惡何足道徑乘一舸浮江湖

江干閉門鬱鬱居石頭浮沈無報書紅紗囊盛一片月  
青玉案泛千明珠清香乍添舌本腴倦游消渴愁相如



